

DISEINUA. Hilaren 18tik 22a arte izango da

Bilbaodiseñok diseinu sektoreko arlo guztiak bilduko ditu

Ekitaldian Balentziaga, Arregi, Okariz eta Capdevilla diseinatzaileak omenduko dituzte

E. Ezkerra | BILBO

Hilaren 18tik 22a bitartean Bilbo diseinuaren hiri bilakatuko da. DZ diseinu zentroaren eta Mobilarte fundazioaren eskutik, Bizkaiko hiriburuko erakustazokak Bilbaodiseño izeneko ekitaldia jasoko du. Kongresuak erronka bikoitzari egingo dio aurre. Batetik, hiriburuak —eta, era berean, Euskal Herriak— halako ezaugarriak dituen ekitaldia jasoko duen lehen aldia izango da. Bestetik, diseinuari begira Europan hainbat kongresu eta bilera egiten badira ere, Bilbokoa da arloko diziplina guztiak bilduko dituen lehena. Hain zuzen, erakustazokak bost gune edukiko ditu: diseinu industrial —diseinu integrala, makina erreminta—, komunikazio bisuala —diseinu grafiko, publizitatea, 3D—, hiriko habitata —arkitektura, make-tak, argiztapena, altzariak—, moda eta osagarriak eta gizarte helburuekin egindako diseinua —trebakuntza zentroak, medikuntza, ortopedia—. Bestalde, Bilbaodiseño zirkuitua deiturikoan hiriburuko 30 lokalek beren diseinuak erakutsiko dituzte.

Sail bakoitzean jorratuko den gaiaren harira, hainbat hitzaldi eta mahai-inguru antolatuko ditu Bilbaodiseñok. Mobilarteko zuzendari Josu Martinezek dioenez, helburua mahai beraren inguruan diseinuaren alderdi guztiak esertzea da, «asko baitira komunean dituzten arazoak». «Orain arte diziplina bakoitza bere aldetik joan da, baina gaur egun sektoreak dituen gabeziak arlo guztietan du eragina. Horietatik garrantzitsuenak trebakuntza falta da, baina diru laguntza urriak eta lan merkatuan sartzeko aukera eskasak ere aipa genitzake». Hizlarien artean, besteak beste, Felix Duque, Alberto Lievore, Jean Pierre Vitrac, Blanka Agiriano, Martin Hoenle eta Alessandro Manetti igaroko dira Bilbotik.

Baina, dudarik gabe, Bilbaodiseño protagonista nagusia moda izango da. Izan ere, kon-

CARPASORO
Cristobal Balentziaga.


gresuaren barruan Cristobal Balentziaga, Miriam Okariz eta Angela Arregi diseinatzaileei zuzenduriko erakusketa jarriko dute. Bertan bilduma pribatuetatik eskuraturiko Balentziagaren lan ezezagunak eta Okarizi 2002ko Cibeles saria irabazten lagundu zioten lanetako batzuk ikusi ahal izango dira. Bestalde, Zilarrezko ditarea 2002 Angela Arregi izenburupean Bilboko diseinatzailearen ibilbidea laburbilduko duen gunea egongo da. Era berean, azken urte hauetan egindako lanetatik Arregik izen bereko saria jasoko du.

Modari zuzenduriko ekitaldien barruan, iragan urtean Bilbon zendutako Guillermo Capdevilla diseinatzaile txiletarrari omenaldia egingo diote.

Gastronomia eta sariak

Gastronomiak ere izango du zeresanik Bilbaodiseñoan. Hain zuzen, Bilboko Arbolagaña, Bermeo, Zortziko eta Iruña jatetxe ezagunek pintxo erakustaldia egingo dute, eta haiek dastatzeko aukera egongo da. Bestetik, kongresuak hiru sari banatuko ditu: arkitekturari zuzendurik dagoen Formica, Guillermo Capdevillaren izenean haren emazte Carmen Lomanak jasoko duena, eta argazkigintzari dagokion Mobilarte Fundazio saria.

LABURREAN



RAUL BOGAJO / ARGAZKI PRESS

Urruzuno literatur lehiaketako sariak banatu dituzte

Gazteak euskara bere gogoeta eta sentimenduak adierazteko tresna gisa erabiltzea. Helburu horri jarraikiz, Jaurilaritzako Hezkuntza Sailak Urruzuno kultur lehiaketako sariak banatu zituen atzo. Literatura omen da sormena lantzeko lanabesik preziazatua, eta badirudi Bigarren Hezkuntzako ikasleek maila gorena erakutsi dutela alor horretan. 20 irabazle izan dira, eta sariak Galesera bidaia eta 250 euro izan dira, beste beste. Sariak pozik agertu ziren atzoko sari banaketan.

MUSIKA

Sei taldek parte hartuko dute Getxoko Habaneran eta Itsas Abestien XVI. Jaialdian

Habanera eta Itsas Abestien Jaialdiaren barruan, Getxok sei talde jasoko ditu bihar hasi eta igandea bitartean. Taldeak hurrengo hauek dira: Portugaleteko Santa Maria abesbatza eta Jarrillero orfeoia, Muskizko Oihartzuna abesbatza, Bilboko Los Chimberos, Centro Asturiano de La Habana (Aviles) eta Duet (Katalunia). Kontzertuak Areetako metro geltokiko karpapean izango dira 20:30ean. Urtero bezala, sarrera doan izango da.

DANTZA

Balletto Di Puglia ariko da gaur Maitaldian

Michel Fokine Errusiako baleten hasierako koreografoa omenduko dute Miarritzeko Maitaldian gaur arratsean. Toni Candeloro, Balletto Di Puglia konpainiako koreografoak, XX. mendearen hasierara eramane du publikoa 21:00etatik aitzina Herriko kasinoan. Gaua hasteko, garaiko Leon Bakst dekoratzailearen jantzien desfilea antolatu dute. Ondotik, Michel Fokinen obra zati zenbait eskainiko dituzte jatorrizko bertsioan. Satie, Stravinski eta Schumannen musikarekin, besteak beste, piano eta arrabita batek eskainirik, «arintasunean» iraganen dela gaua azaldu zuen Thierry Malandain Maitaldiaren zuzendari artistikoak.

ANTZERKIA

Roberto Vidal Bolaño hil da, Galiziako antzerki independentearen bultzatzaileetako bat

Roberto Vidal Bolaño antzerkigile galiziarra Santiagoko Ospitalean hil zen atzo, gaixotasun luze baten ostean. Vidal Bolañok 52 urte zituen, eta astelehenean ingresatu zuten, aspalditik zuen gaixotasuna areagotu egin ostean. Galiziako antzerki independentearen bultzatzaileetako bat izan zen, eta Antroido konpainia sortu zuen 1974an. *Percival* eta *Romance dos figos de ouro* obrak aipa daitezke bere lanen artean.

LITERATURA

Atal berri bi dakartza Euskal Idazleen Elkarteak kaleratzen duen 'Hegats'-en azken aleak

E. Ezkerra | BILBO

Aldaketekin dator *Hegats*-en 30. alea. Orain arte aldizkariak zituena atalei beste hiru gaineratu zaizkio. Modu horretan, literatura argitalpenak agertzen zituen *Literatur bideak* eta liburu iruzkinekin batera *elkarrizketa* eta *txosten monografikoa* izeneko atalak aurki daitezke. Atzo Igor Estankona Euskal Idazleen Elkartearen lehendakariordeak azaldu zuenez, aldaketak iraunkorrak izango dira, eta irakurleari informazio sakonagoa ematea dute xede.

Txosten monografikoa-k EIEko batzordeak erabakitako gai bati buruzko artikuluak bilduko ditu. Oraingoan prosa zientifikoa da protagonista, eta atalak iaz Eibarren antolaturiko jardunaldiaren bost hitzaldi dakartza: Iñaki Irazabalbeitiaren *Zientzia komunikazioa Euskal Herrian: hurbilketa moduko bat*, Jose Ramon Etxebarriaren *Euskal prosa zientifikoa*, Josea Felix Tobarren *Literatura zientifikoa eta sasizientifikoa*, Kepa Altonagaren *Saiakera zientifikoa idazteko abiapuntu bat* eta Marian Iriarte, Jose M. Elortza eta Jesus M. Ugalderekin *Euskarazko prosaren eta kimikaren arteko kimika. Elkarrizketa*-k, berriz, Maite Gonzalez Esnalek Salbador Garmendiarekin izandako solasaldia dakar. Jardunaldiko gainontzeko ponentziak EIEren web orrian irakur daitezke.

Bestetik, *Literatur bideak* atalak Ibon Sarasolak euskaraturiko Ausias Marchen *Zazpi poema* eta iragan apirilean Josu Jimenez Maiari Orixe saria eman zion *Semearen hatsa* kontakizun laburra bildu ditu. Liburu iruzkinei dagokienez, Tere Irastortzak Mikel Zabalaen *Euskaldunak matxino (Matxinadak ulertzeko gida)* liburuari buruz idatzi du. Estankonak iruzkinean atalean idatzeko prest dauden idazleak aurkitzea zein zaila den aipatu zuen, baina denborarekin kolaboratzaile gehiago aurkitu eta atala sendotuz joateko asmoa dutela esan zuen.

Banaketa sistema berria

Ale horrekin *Hegats*-ek banaketa sistema berri eta hobetu bati ekin dio. Guztira 11 hiriburutan egongo da salgai, besteak beste, Bilbon, Donostian, Iruñean, Gasteizen, Baionan, Zarautzen, Bergaran, Tolosan eta Ondarroan. Azken alea literatura zientifikoari zuzendurik dagoenez, orain Bilboko fakultatean ere erosteko aukera dago.